

تبریزیم منیم ...

یاشی تاریخ له برابر باشلانان شهریمیزین کنچمیشی نه قدر معمالی اولسادا اؤز جواهر بسله یین قونوندا صایا گلمز افتخارلار یاراتدیغی هامی یا معلوم دور.

کوره گی سهنده سؤیکه نن، صاچلاری ساوالان لا هاوالانان، یاناغین دان آجی - آراز آخان، عثینالی دان بویلا نیب صاباحلارا باخان، تاریخ بویونجا خور باخانین ائوبنی ییخان - یاخان تبریز.

اگیلمه یین قامت لر، صولمایان سیمالار، غروبا اوغرامایان گونش لر، رنگ سیز و ریاسیز اوره ک لر - فریاد دولو بوغازلار، رمز و راز چاغلایان سازلار، درد داستانی آواز لار و یار یوردو تبریز.

قانلی - قادالی قرن لر بویو قونونا آلیب قوجاقلادیغی قیلینج و قلم قهرمانلاری صایماق لا باشا گلمز کی. خاقانی نی و فلکی نی و ذولفقاری و نسیمی نی شیروان دان، قطب الدینی و مانی نی شیراز دان، ظهیر الدینی فاریاب دان، کمالی خجند دن، بهزادی هرات دان، اسدی نی طوس دان، ابوالحسن خان اقبال السلطانی قزوین دن و کیملری و کیملری هارالاردان معجزه لی جاذبه سی ایله چکیب گتیرمیش و بوتون بو قدرین یئرینه بیر تک شمس تبریزی نی روما گؤنده ریمیش اولماسی کفایت ائدر.

مگر استانبولون اسلامبول شکلینه گتیریلمه سی اوچون اشغالچی عثمانلی سلطانی تبریز دن اسیر علیرضا کیمی معمارلاری، نقاش لاری، اوستا صنعتکارلاری آپارمادی؟ مگر شاه عباس اصفهانین پایتخته بنزه دیلمه سی اوچون تبریزین تجارینی، علم و ادب آدام لارینی، صنعت اوستا لارینی آپاریب **تبارزه** (تبریزلیر) محله سینه یئرلشدیریب فخرینی قازانماسی اوچون عباس آباد آدینی وئرمه دی؟

نه قدر بیرینجی لیک لره و ایلک لره صاحب سن تبریز؟ : بیرینجی قورقوشوم حرفلی مطبعه، بیرینجی عالی تحصیل مرکز، بیرینجی نظمی، بیرینجی عدلیه، بیرینجی بلدی، بیرینجی اطفائی، بیرینجی دمیر یول واغزالی، بیرینجی کار و لال لار و مکتبی، تازا اصول ایله تحصیل سیستمی، بیرینجی تئاتر، نستعلیق خطی، مدرن شعر (شعر نو)، مشروطه، قانون، ... بیرینجی لر و بیرینجی لر.

هانسی اقلیمین قوجاغیندان و اوچاغیندان سنین یئتیشدیردیگین، دوغوب توره تدیگین، بؤیودوب بویا - باشا چاتدیردیغین قدر کیفیت و کمیت جه اوغول لار عرصه یه گلیمشیدیر؟ شعرده همام تبریزی، قطران تبریزی، خطیب تبریزی، صائب تبریزی، ایرج میرزا، پروین اعتصامی و گؤزلرین آخره قالیمیش بؤیوک شهریار - نقاش لیقدا میرک، میرمصور، رسام ارژنگی. علی اکبر یاسمی، منصور قندریز، باجالانلو - خط هنرینده نستعلیقین ابداعچی سی خواجه میر علی تبریزی، صیرفی تبریزی، ملا عبدالباقی

تبریزی، ملا علی‌بیگ تبریزی، رفعتی تبریزی، میرزا طاهر خوشنویس، حاجی میرزا حسن هریسی -
اسلام دینمیزین علملرینده بیر تک علامه طباطبائی نین آدینی چکمک کفایت ائتمزمی؟
شعرده تبریز مکتبی، مینیاتوردا تبریز مکتبی، خط ده تبریز مکتبی، موسیقی ده تبریز مکتبی، آوازدا تبریز
مکتبی و فرش ده تبریز فرشی.

تبریز! دوغما آنان ایرانی دفعه لرله روس و عثمانلی اشغالچی لاردان قورودوغون اونودولما یا جاق.
تبریز! مشروطه انقلابینی باشلاماغینلا استبدادی داشلاماغین خاطره لردن سیلینمه یه جک.
تبریز! ثقه الاسلام دان و شیخ محمد خیابانی دن توتמוש ۸ ایللیک مدافعه ده کی دینه و ایرانا وئردیگین
صون شهیدینه قدر قوربان لاری نین قانی قورو ما یا جاق و اونلارین مقدس آرمانلاری قوروناجاق دیر.